



## Azwan harumkan nama UMP rangkul Ikon Varsiti BH



Azwan Affandi Md. Jahaya, 21 yang merupakan pelajar Fakulti Sistem Komputer & Kejuruteraan Perisian (FSKPP), berjaya dinobatkan Ikon Varsiti 2012 anjuran akhbar Berita Harian dengan kerjasama Kementerian Pengajian Tinggi dalam Majlis Penyampaian Anugerah Ikon Varsiti BH yang diadakan di Hotel Royale Chulan, Kuala Lumpur pada 25 Januari 2013 yang lalu.

Azwan Affandi yang menang kategori individu keusahawanan membawa pulang wang tunai RM2,000 dan trofi setelah berjaya mengalahkan dua calon lain iaitu Nor Suriani Azhar dari Universiti Sultan Zainal Abidin (UniSza) dan Azizul Ridhuan Wahid dari Universiti Teknologi MARA (UiTM) Arau, Perlis.

Kejayaan adalah hasil kecemerlangannya dalam mengusahakan syarikat Azwan Dot Com Enterprise yang memasarkan produk aksesori telekomunikasi, alatan IT dan percetakan di UMP serta 84 kolej komuniti di Malaysia.

Selain itu, kejayaan turut diraih tujuh pelajar Universiti Malaysia Pahang (UMP) dari Kelab In-Smartive yang terdiri daripada Nur Rahimah Mohd Sofyan, Nurul Farhana Abu Kasim, Nor Atikah Salleh, Mohamad Saidi Ismail, Nor Zaratunaimah Kolan, Ahmad Arif Fauzi, Mohd Jamil Mohd Jaafar dan Haffizothul Ommi Aziz yang dinobatkan

antara tiga kumpulan terbaik bagi kategori Projek Khidmat Sosial (CSR) dalam negara.

Anugerah kumpulan ini dimenangi pasukan Students in Free Enterprise Universiti Kuala Lumpur Malaysian Institute of Industrial Technology (SIFE UniKL Micet) manakala satu lagi kumpulan yang bersaing dalam kategori yang sama adalah pasukan Preparatory Program dari Universiti Tenaga Nasional (UNITEN).

Menurut Timbalan Naib Canselor (Penyelidikan & Inovasi), Profesor Dato' Dr. Rosli Mohd. Yunus yang hadir mewakili Naib Canselor UMP berkata, kejayaan pelajar ini membanggakan universiti dan diharapkan dapat memberi suntikan semangat kepada pelajar lain.

"Pelajar UMP harus teruskan usaha untuk mencipta kejayaan dalam pelbagai bidang yang diceburi termasuk sumbangan terhadap khidmat masyarakat dalam dan luar negara," katanya yang percaya pelajar UMP memiliki bakat dan kepimpinan yang boleh dinobatkan sebagai ikon untuk dicontohi pelajar lain pada masa akan datang," katanya.

Sementara itu, Presiden Kelab In-Smartive, Mohd Jamil Mohd Jaafar berkata, pasukan In-Smartive dipilih berdasarkan komitmen dan sumbangan pasukan ini

dalam menjalankan program motivasi dan pelaksanaan program Projek Kilauan Mutiara, Teach Malaysia Teach (TMT) yang dijalankan di sekolah sekitar Pahang.

"Kejayaan dipilih tiga kumpulan terbaik ini memberikan pasukannya lebih bersemangat untuk meneruskan sumbangan terhadap khidmat komuniti dan program kesukarelawanan pada masa akan datang," katanya.

Beliau berbangga dengan mendapat sokongan padu daripada pihak universiti terutamanya Penasihat Kelab In-Smartive, Wan Nazrul Helmy Wan Mohd Zain dan Yang di-Pertua Majlis Perwakilan Pelajar (MPP) yang hadir meraikan kejayaan mereka.

Anugerah Ikon Varsiti anjuran Berita Harian yang buat julung kalinya diadakan ini mempertandingan 14 kategori membabitkan penyertaan secara individu dan berkumpulan di kalangan pelajar institusi pengajian tinggi awam dan swasta termasuk Kolej Profesional MARA, Institut Kemahiran, Politeknik dan Kolej Komuniti.

Hadir dalam majlis Menteri Pengajian Tinggi, Dato' Seri Mohamad Khaled Nordin, Pengarang Kumpulan Berita Harian, Datuk Mior Kamarul Shahid, Timbalan Pengarah Kumpulan BH, Mahfar Ali dan Pengarang Pendidikan BH, Muhd. Yusof Abu Bakar.